

# Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2015-yil 21-fevral, shanba № 15 (15861)

Ўзбекистон Республикаси Президентининг ФАРМОНИ

## ЎЗБЕКИСТОН RESPUBLIKASI FUQAROLARI – 1941-1945 ЙИЛЛАРДАГИ УРУШ ВА МЕХНАТ ФРОНТИ ФАХРИЙЛАРИНИ «ИККИНЧИ ЖАХОН УРУШИДАГИ ГАЛАБАНИНГ 70 ЙИЛЛИГИ» ЭСДАЛИК ЮБИЛЕЙ МЕДАЛИ БИЛАН МУКОФОТЛАШ ТЎҒРИСИДА

2015 йил 9 майда умумхалқ байрами – Хотира ва қадрлаш куни ўтказилиши, шунингдек, Иккинчи жаҳон урушида фашизм устидан қозонилган Галабанинг 70 йиллиги байрам қилиниши муносабати билан фашизм устидан қозонилган Галабага бебаҳо хисса қўшган Ўзбекистон фуқаролари – 1941-1945 йиллардаги уруш ва меҳнат fronti фохрийларини муносиб равишда ва иззат-икром билан шарафлаш мақсадида:

1. 1941-1945 йиллардаги Иккинчи жаҳон урушида фашизм устидан қозонилган Галабанинг 70 йиллиги шарафига “Иккинчи жаҳон урушидаги Галабанинг 70 йиллиги” эсдалик юбилей медали таъсис этилсин.

2. Белгилаб қўйилсинки, “Иккинчи жаҳон урушидаги Галабанинг 70 йиллиги” эсдалик юбилей медали билан Ўзбекистон Республикаси фуқаролари – “1941-1945 йиллардаги Улуғ Ватан урушида Германия устидан қозонилган галаба учун” ва “Япония устидан қозонилган галаба учун” медаллари билан, уруш йилларида жанговар хизматлари учун олинган бошқа орден ва медаллар билан мукофотланган ёки уруш қатнашчиси гувоҳномасига ёхуд Ватан уруши ногирони гувоҳномаларига эга бўлган Иккинчи жаҳон уруши қатнашчилари ва ногиронлари, шунингдек, Иккинчи жаҳон уруши йилларида фидокорона меҳнати учун мукофотланган, шу жумладан, “1941-1945 йиллар Улуғ Ватан урушидаги шавкатли меҳнати учун”, “Меҳнатдаги жасорати учун”, “Меҳнатда ўрнатилган кўрсаткичи учун” медалларига ёки 1941-1945 йиллардаги уруш даврида қуролли кучларда фуқаро шахсларни эркин ёллаш бўйича штат лавозимида бўлганлик тўғрисидаги гувоҳномага эга бўлган меҳнат fronti қатнаш-

чилари мукофотланадилар.

3. “Иккинчи жаҳон урушидаги Галабанинг 70 йиллиги” эсдалик юбилей медали тўғрисидаги Низом ва унинг тавсифи 1- ва 2-иловаларга мувофиқ тасдиқлансин.

4. Ўзбекистон Республикаси Мудофаа вазирлиги, Ички ишлар вазирлиги, Миллий хавфсизлик хизмати Меҳнат ва аҳолини ижтимоий муҳофаза қилиш вазирлиги ҳамда Молия вазирлиги ҳузуридаги Пенсия жамғармаси билан биргаликда икки ҳафта муддатда “Иккинчи жаҳон урушидаги Галабанинг 70 йиллиги” эсдалик юбилей медали билан мукофотланиши лозим бўлган 1941-1945 йиллардаги уруш фохрийлари ва ногиронларининг, меҳнат fronti қатнашчиларининг аниқ рўйхатини тузиб, Вазирлар Маҳкамасига киритсин.

5. Ўзбекистон Республикаси Вазирлар Маҳкамаси:

Марказий банк ва “Давлат белгиси” давлат-ишлаб чиқариш бирлашмаси билан биргаликда бир ой муддатда “Иккинчи жаҳон урушидаги Галабанинг 70 йиллиги” эсдалик юбилей медаллари ва уларнинг гувоҳномалари бланклари белгиланган тартибда тайёрланишини таъминласин;

2015 йилнинг 1 мартига қадар Иккинчи жаҳон урушида фашизм устидан қозонилган Галабанинг 70 йиллиги мамлакатимизда кенг байрам қилинишига бағишланган тадбирлар дастурини ишлаб чиқсин ва тасдиқласин, унда 1941-1945 йиллардаги уруш ва меҳнат fronti фохрийларини “Иккинчи жаҳон урушидаги Галабанинг 70 йиллиги” эсдалик юбилей медаллари билан тантанали ва байрамона вазиятда мукофотлаш чора-тадбирлари кўзда тутилсин.

6. Мазкур Фармоннинг ижросини назорат қилиш Ўзбекистон Республикасининг Бош вазири Ш.Мирзиёев зиммасига юклансин.

Ўзбекистон Республикаси Президенти

И.КАРИМОВ

Тошкент шаҳри, 2015 йил 19 февраль

Мазкур Фармоннинг иловалари 2-саҳифада берилган.

### Ehtimom

Ўзбекистон халқ шоири Зулфия ҳаёти ва ижодига бағишланган www.zulfiyaxonim.uz сайти ишга туширилди. Янги веб-ресурс Хотин-қизлар қўмитаси ташаббуси билан Ахборот технологиялари ва коммуникацияларини ривожлантириш вазирлиги қўмағида яратилган.

## Интернет оламидаги Zulfiyaxonim

Сайтнинг тақдимот маросими пойтахтимиздаги Ёшлар ижод саройида бўлиб ўтди. Унда сайтни яратишда яқиндан ёрдам берган ҳамкор ташкилотлар — “Электрон ҳукумат” тизимини ривожлантириш, UZINFOCOM ва Ziyonet ресурс марказлари мутахассислари, таниқли ижодкор ва таржимонлар, Зулфия номидаги Давлат мукофоти совриндорлари, талаба-ёшлар қатнашди.

Тадбирни Ўзбекистон Республикаси Бош вазирининг ўринбосари, Хотин-қизлар қўмитаси раиси Элмира Боситхонова очиб берди.

Давоми 3-саҳифада

### Asrga tengdosh insonlar

## КАРИМ БОБОНИНГ АСРИЙ ЎГИТЛАРИ

Бухоро вилояти Вобкент туманидаги Имом Қозихон қишлоғида умргузаронлик қилаётган Карим Назаров бугун 101 ёшда. Президентимиз фармонига биноан, мамлакатимиз мустақиллигининг 23 йиллиги муносабати билан у “Шухрат” медалига сазовор бўлди. Юз билан юзлашган мўйсафиднинг суҳбатидан бахраманд бўлиш мақсадида қишлоққа йўл олдик.

Давоми 4-саҳифада

### Davlat mukofoti sohiblari

## ҲАЁТ АСЛИДА ЎРГАНИШДАН ИБОРАТ

Телевидениеда реал ҳаёт манзаралари акс этади. Аудитори-янинг ушбу манзараларга нисбатан муайян фикрини уйғотиш, бевосита муносабатини шакллантиришда телебошловчиларнинг ҳиссаси ва хизмати беқиёс. Умрининг салмоқли қисми шундай қизиқарли жараён ичида кечган таниқли суҳандон, Ўзбекистон халқ артисти Абдумўмин Ўтбосаров билан суҳбатимиз сизни-да бефарқ қолдирмайди.

Давоми 5-саҳифада

## НИМА ҚИЛДИК ВАТАН УЧУН?



Муқимжон ҚОДИРОВ (ЎЗА) олган сурат

Маданият ва спорт ишлари вазирлиги, “Ўзбекнаво” эстрада бирлашмаси ва Фарғона вилояти ҳокимлиги ҳамкорлигида ташкил этилган тадбирда эл ардоғидаги ёзувчи ва шоирлар, маданият ва санъат намояндалари қатнашди. Таниқли эстрада хонандалари

ҳамда ёш ижрочилар иштирокида концерт дастури намойиш этилди. Ватанга меҳр ва садоқат туйғулари билан йўғрилган дилтортар тароналар ёшу қарига бирдек манзур бўлди.

(Давоми 2-саҳифада)

Пойтахтимизда «Жамият ва мен» ва «Эътироф» республика танловлари ғолибларини тақдирлаш маросими бўлиб ўтди.

## МЕХНАТГА МУНОСИБ ЭЪТИРОФ

Тадбирда Ўзбекистон мустақил босма оммавий ахборот воситалари ва ахборот агентликларини қўллаб-қувватлаш ва ривожлантириш жамоат фонди директори А.Абдуллаев, Ўзбекистон Журналистлари ижодий уюшмаси раиси И.Ҳалимбеков ва бошқалар юртимизда миллий журналистикани изчил равнақ топтириш, оммавий ахборот воситаларининг таъсирчанлигини ошириш масалаларига алоҳида эътибор қаратилаётганини таъкидлади.

Давоми 3-саҳифада

Kun mavzusi

# Ўзбекистон Республикаси Президентлигига номзодлар рўйхатга олинди

Марказий сайлов комиссиясининг навбатдаги мажлиси бўлиб ўтди. Унда Ўзбекистон Республикаси Президентлигига номзодларни рўйхатга олиш, уларнинг оммавий ахборот воситаларида олиб борадиган сайловолди ташвиқоти, номзодларнинг таржимаи ҳоли ва сайловолди дастурлари эълон қилинган босма махсулотларни тайёрлаш тўғрисидаги масалалар кўриб чиқилди.

Сайлов кампанияси мамлакатимиз қонунчилиги ва Марказий сайлов комиссияси томонидан тасдиқланган Ўзбекистон Республикаси Президентлигига номзодларни сайловига тайёргарлик кўриш ва уни ўтказиш бўйича асосий тадбирлар дастурига тўла мувофиқ очик ва ошкоралик тамойиллари асосида амалга оширилмоқда.

Аввал хабар қилганимиздек, юртимизда фаолият олиб бораётган тўртта сиёсий партия — Тадбиркорлар ва ишбилармонлар ҳаракати — Ўзбекистон Либерал-демократик партияси, Ўзбекистон Халқ демократик партияси, Ўзбекистон «Миллий тикланиш» демократик партияси, Ўзбекистон «Адолат» социал-демократик партияси томонидан Марказий сайлов комиссиясига Ўзбекистон Республикаси Президентлигига кўрсатилган номзодларни рўйхатга олиш учун қонунда белгиланган ҳужжатлар тақдим этилган эди. Марказий сайлов комиссияси

сиёсий партиялар томонидан тақдим этилган ҳужжатларни кўриб чиқиб, Ўзбекистон Республикаси Президентлигига номзодларни рўйхатга олиш тўғрисида қарор қабул қилди. Унга кўра, Тадбиркорлар ва ишбилармонлар ҳаракати — Ўзбекистон Либерал-демократик партиясидан Ислоҳ Абдуганиевич Каримов (1938 йилда туғилган, айна вақтда Ўзбекистон Республикаси Президенти), Ўзбекистон Халқ демократик партиясидан Хотамжон Абдурахмонович Кетмонов (1969 йилда туғилган, Олий Мажлис Қонунчилик палатаси спикерининг ўринбосари), Ўзбекистон «Миллий тикланиш» демократик партиясидан Акмал Холматович Саидов (1958 йилда туғилган, Олий Мажлис Қонунчилик палатаси Демократик институтлар ва фуқароларнинг ўзини-ўзи бошқариш органлари қўмитаси раиси), Ўзбекистон «Адолат» социал-демократик партиясидан Наримон

Мажитович Умаров (1952 йилда туғилган, Олий Мажлис Қонунчилик палатаси спикерининг ўринбосари) Ўзбекистон Республикаси Президентлигига номзодлар этиб рўйхатга олинди.

«Ўзбекистон Республикаси Президенти сайлови тўғрисида»ги қонуннинг 28-моддасига кўра, сайловолди ташвиқоти Ўзбекистон Республикаси Президентлигига номзодлар Марказий сайлов комиссияси томонидан рўйхатга олинган кундан бошланади. Шунга мувофиқ Марказий сайлов комиссияси Ўзбекистон Республикаси Президентлигига номзодларнинг сайловолди ташвиқоти тўғрисида қарор қабул қилди. Қарорга асосан сайловолди ташвиқоти даврида номзодларга, сиёсий партияларга белгиланган тартибда оммавий ахборот воситаларидан фойдаланишда тенг ҳуқуқ берилди. Лекин бу тамойил партия наشرларига нисбатан татбиқ этилмайди. Улар тегишли материалларни исталган ҳажмда чоп этиши мумкин.

Ўзбекистон Республикаси Президентлигига номзодлар «O'zbekiston», «Yoshlar» ҳамда маҳаллий теле ва радиоканалларда, «Халқ сўзи», «Народное слово», «Правда Востока» республика даврий наشرлари ва маҳаллий наشرларда чиқишларни амалга оширади. Номзодларга ўз сайловолди дастурларининг асосий қоидаларини сайловчиларнинг эътибор



рига етказиш учун Ўзбекистон Миллий телерадиокорпорациясининг «O'zbekiston» ва «Yoshlar» теле ва радиоканалларида 900 дақиқадан эфир вақти берилди, «Халқ сўзи», «Народное слово» ва «Правда Востока» республика даврий наشرларида 10 саҳифа наشر майдони ажратилди. Ўзбекистон Республикаси Президентлигига номзодлар оммавий ахборот воситаларида сайловолди ташвиқоти материалларининг турлари, шакллари, услублари ва мазмунини мустақил белгилайди.

Мажлисида оммавий ахборот воситаларига сайловга тайёргарлик кўриш ва уни ўтказишга тааллуқли ахборотлардан фойдаланиш учун барча шароитлар яратилаётгани алоҳида таъкидланди. Шу мақсадда Марказий сайлов комиссияси томонидан 340дан зиёд миллий ва хорижий ОАВ вакиллари аккредитациядан ўтказилди.

Шу куннинг ўзида Ўзбекистон Республикаси Президенти сайловини ёритиш бўйича Республика матбуот марказида мамлакатимиз ва хорижий оммавий ахборот воситалари вакиллари учун брифинг ўтказилди.

**Жавлон ВАФОВЕВ,**  
**«Turkiston» мухбири**

Президентимиз Ислоҳ Каримов Ўзбекистон Республикаси Олий Мажлиси Қонунчилик палатаси ва Сенатининг қўшма мажлисидаги маърузасида юртимизда ҳукм сураётган тинчлик ва барқарорлик, меҳр-оқибат муҳитини асраш, шу билан бирга, юз бериши мумкин бўлган ҳар қандай хатарларнинг олдини олиш зарурлигига алоҳида эътибор қаратди.

## ТИНЧЛИКНИ АСРАШГА МАСЪУЛМИЗ

Дарҳақиқат, бугунги кунда дунёда содир бўлаётган айрим нохуш воқеалар, радикализм, терроризм ва экстремизм каби таҳдидларнинг кучайиб бораётгани шуни тақозо этади. Халқимиз кўлга киритаётган улкан ютуқларга ўз-ўзидан эришилаётгани йўқ. Мамлакатимизнинг тарихан қисқа даврда босиб ўтган тараққиёт йўли, бу йўлда кўлга киритилган, дунё ҳамжамияти томонидан тан олинаётган ютуқ ва марраларимизга қандай синов ва машаққатлар эъзага эришилганини юртдошларимиз яхши англайди. Шу боис тинчликни кўз қорачигидек асраш долзарб масалалардан ҳисобланади.

Ўзбекистон Республикаси Ички ишлар вазирлиги Маданият саройида аҳоли ва ёшларни турли зарарли иллатлардан ҳимоя қилиш, диний экстремизм ва терроризм хавфини бартараф этишда ўзаро ҳамкорликни мустаҳкамлаш масалаларига бағишлаб ўтказилган тадбирда шулар ҳақида сўз юритилди.

Ўзбекистон Республикаси ички ишлар вазирлиги ўринбосари, полковник А.Мирзаев, Тошкент ислом университети проректори У.Фафуров ва бошқалар Президентимиз Ислоҳ Каримов раҳнамолигида мамлакатимизда изчиллик билан амалга оширилаётган ислохотлар демократик ҳуқуқий давлат, кучли фуқаролик жамияти барпо этишга, фуқароларнинг эркин ва фаровон ҳаёт кечирishiга мустаҳкам замин яратганини таъкидлади. Аҳоли маънавиятини юксалтириш, фарзандларимизни миллий ва умуминсоний қадриятларга ҳурмат руҳида тарбиялаш йўлида қилинаётган эзгу ишлар юртимизнинг порлоқ истиқболли учун хизмат қилаётир.

Ёшлар ўртасида соғлом турмуш тарзини қарор топтиришда уларни гиёҳвандлик, ахлоқсизлик, четдан кириб келаётган турли зарарли таъсирлардан, «оммавий маданият»нинг таҳдид ва хатарларидан асраш масалалари — доимий эътиборда. Чунки ҳозирги мураккаб замонда миллий қадриятларимизга ёт гоёлар, ёшларимизнинг онги ва қалбини эгаллашга қаратилган ғаразли хуружлар, миссионерлик каби оқимлар тобора кучайиб бораётгани барчамизни янада хушёр ва огоҳ бўлишга ундамоқда.

Давлатимиз раҳбари «Юксак маънавият — енгилмас куч» асарида таъкидлаганидек, «маънавиятга қарши қаратилган ҳар қандай таҳдид ўз-ўзидан мамлакат хавфсизлигини, унинг миллий манфаатларини, соғлом авлод келажагини таъминлаш йўлидаги жиддий хатарлардан бирига айланиши ва охир-оқибатда жамиятни инқирозга олиб келиши мумкин».

Тадбирда ёш авлод зарарли диний оқимлар, миссионерлар таъсирига тушиб қолишининг олдини олиш, ёшларни билимли, ватанпарвар ва ҳар томонлама етуқ инсон этиб тарбиялаш борасида амалга оширилаётган ишларга эътибор қаратилди. Ёшлар бундай ғаразли кучлардан доимо огоҳ бўлиши учун уларнинг билими, маънавиятини юксалтиришга қаратилган чора-тадбирлар кўлами кенгайтирилмоқда. Бу жараёнда ички ишлар идоралари, ўқув муассасалари, жамоат ва диний ташкилотлар ҳамкорлигида тегишли тадбирлар тизимли равишда ташкил этилаётгани ўз самарасини бермоқда.

Ўзбекистон Республикаси Ички ишлар вазирлиги, соҳавий хизматлар масъул ходимлари, давлат ва жамоат ташкилотлари вакиллари иштирок этган тадбирда ёшларни турли таҳдидлардан ҳимоя қилиш, уларда юрт равнақида дахлдорлик ҳиссини тарбиялаш юзасидан олиб борилаётган ишлар, диний экстремизм мафқураси тарқалишининг олдини олиш борасида қилиниши зарур бўлган долзарб вазифалар белгилаб олинди.

**Н.АБДУРАИМОВА,**  
**Ўза мухбири**

Xabarlar

## ЛОЧИНЛАР ПАРВОЗИ

Жиззах вилояти ахборот-ресурс марказида «Камолот» ёшлар ижтимоий ҳаракати вилоят кенгаши ташаббуси билан Абдулла Қодирий номидаги Жиззах давлат педагогика, Жиззах политехника институтларининг талабалари ҳамда Жиззах олий ҳарбий авиация билим юрти курсантлари ўртасида «Заковат» интеллектуал ўйини ташкил этилди.

Ушбу интеллектуал мусобақани ўтказишдан мақсад фаол, иктидорли, билимли, изланувчан, ижодкор талабаларни излаб топиш, кўллаб-қувватлаш, рағбатлантириш ҳамда уларнинг ўз ақл-заковатини намоён этишига кўмаклашиш, ёшларни мустақил фикрловчи баркамол инсонлар қилиб вояга етказишдан иборат.

Жамоалар 24 та саволга кетма-кет тартибда жавоб қайтарди. Саволларга энг кўп жавоб топган Жиззах олий ҳарбий авиация билим юрти курсантларининг «Самолотчи» жамоаси биринчи ўринни кўлга киритган бўлса, Жиззах политехника институтининг «Тарғиботчилар» жамоаси иккинчи ва Жиззах давлат педагогика институтининг «Зиёкор» жамоаси учинчи ўринга лойиқ деб топилди.

Тадбир «Камолот» ЁИХ вилоят кенгаши қошидаги «Кувноқлар ва зукколар» жамоаларининг чиқишлари ҳамда голибларга диплом ва эсдалик совғалар топшириш маросими билан якунланди.

**Чарос ЁКУБОВА**  
**Жиззах вилояти**

Олий ва ўрта махсус таълим вазирлиги ҳузуридаги «Маънавият ва маърифат» марказида «Глобаллашув жараёнида «оммавий маданият»нинг ёшлар онгига салбий таъсири» мавзусида давра суҳбати бўлиб ўтди.

## ТАРМОҚДАГИ «ҚАРМОҚ»

Унда соҳа мутахассислари, Ўзбекистон миллий университети ва Тошкент давлат техника университети талабалари иштирок этди.

Тадбирда «оммавий маданият»нинг ёшлар онгига таъсири ҳозирги кунда долзарб муаммога айланиб бораётгани ҳамда ғайриинсоний, салбий гоёларни миллий қадриятларимиз орқали бартараф этиш энг тўғри йўл экани таъкидланди.

— Тараққиёт жараёнида интернет кўп имкониятларга йўл очиб бераётгани бор гап, — дейди «Маънавият ва маърифат» маркази услубчиси Наргиза Дўсимбетова. — Шу туфайли интернет «ахборот манбаи» деб аталаётгани бежиз эмас. Бу тармоқдан истаган пайтда фойдаланиш, турли мамлакатлардаги янгиликлардан бир зумда воқиф бўлиш баробарида унинг ёшлар онгини захарловчи «оммавий маданият»ни тарғиб қилишга ҳам хизмат қилиши оғриқли ҳолдир. Унинг олдини олиш мақсадида из доминида менталитетимизга хос маълумотлар жойлаштирилади.

Давра суҳбати таклиф ва мулоҳазаларга бой бўлди. Иштирокчилар ўзларини қизиқтирган саволларга жавоб олди.

**Алибек ОМОНТУРДИЕВ,**  
**«Turkiston» мухбири**

«Kamolot» YIH hududiy kengashlarida

# ФАОЛИЯТИМИЗНИ ХОЛИС БАҲОЛАЙЛИК

«Kamolot» ёшлар ижтимоий ҳаракатининг ҳудудий кенгашларида 2014 йил якунига бағишланган ҳисобот йиғилишлари ўтказилгани ҳақида хабар берган эдик. Таҳлилий, танқидий руҳда ўтган йиғилишларда йўл қўйилган камчиликлар муҳокама этилиб, ёшлар ташкилоти фаолияти самарадорлигини оширишга қаратилган таклифлар асосида режалар белгиланди.

Ҳаракатнинг **БУХОРО** вилояти кенгаши сарҳисоб йиғилиши қизгин муҳокамага бой ўтди.

Йиғилишда қайд этилишича, айна пайтда вилоятда 1064та бошланғич ташкилот фаолият кўрсатмоқда. Ўтган йилнинг ўзиде 14та бошланғич ташкилот фаолияти йўлга қўйилди.

Ўтказилган турли тадбир ва кўриктанловлар орқали 3000 нафарга яқин йигит-қиз рағбатлантирилди. Ёш тадбиркорларни қўллаб-қувватлаш борасида олиб борилган саъй-ҳаракатлар натижасида 416 нафар ёш тадбиркорга ўз фаолиятини давом эттириш учун 4 миллиард 285 миллион сўмлик имтиёзли кредит берилди. Ёшлар бандлигини таъминлаш, эътиборга муҳтож ёшларга кўмак бериш, профилактик назоратда турган ўғил-қизлар учун тўғрақлар ташкил этиш, уюлмаган ёшларнинг жамият ҳаётида фаол иштирокини таъминлаш, хайрли ташаббусларни амалга ошириш борасида қилинган ишлар эътиборга лойиқ.

Бироқ айрим жиҳатларда камчиликка йўл қўйилган. Баъзи тадбир ва кўриктанловлар юқори савияда ташкил этилмади, уларга ёшлар кенг қамраб олинмаган. Анъанавий тарзда ҳеч қандай янгиликларсиз, ҳисобот учун ўтказилгани боис тадбирларга қизиқиш камлиги кузатилди. Бунга Ҳаракатнинг айрим туман ва шаҳар кенгашлари фаолиятида йўл қўйилган сустанкашликлар сабабдир. Хусусан, Ҳаракатнинг Бухоро ва Когон шаҳарлари, Ғиждувон, Шофиркон, Жондор, Қорақўл туманлари кенгашлари фаолияти танқидий баҳолаб, камчиликларни бартараф этиш учун керакли тавсиялар берилди. Тарбияси оғир, айниқса, қайта тарбиялаш колонияларидаги болалар билан ишлаш самарадорлигини ошириш зарурлиги таъкидланди.

Йиғилишда Ромитан, Олот, Пешкў туманлари кенгашлари Ҳаракатнинг 2014 йилдаги бюджет ижросини етарли даражада ташкил этмагани танқид қилинди. Ёш тадбиркорларни қўллаб-қувватлаш, имтиёзли кредит олиб, фаолиятини муносиб давом эттиришлари учун шароит ва имкониятлар яратилганига қарамай, «Ёш тадбиркор — юртга мададкор» ҳамда «Менинг бизнес гоям» танловларининг республика босқичи ғолиби бўлган 19 нафар ёш тадбиркорнинг 6 нафари имтиёзли кредит олиш учун банк билан боғлиқ муаммоларга дуч келмоқда. Йиғилишда ҳамкор ташкилот сифатида иштирок этган Марказий банкнинг вилоят бош бошқармаси вакили бу масала тез кунда ечимини топишни билдириди.

Шунингдек, Ҳаракат қошида ташкил этилган «Ёшлар ижтимоий хизматлари» марказлари фаолиятини замон талабига мос хизмат турлари билан мустақамлаш зарурлиги қайд этилди.

**Лайло ХАЙИТОВА,**  
**«Turkiston» мухбири**

Бердақ номидаги Қорақалпоқ давлат университетининг «Kamolot» ЁИХ ҚОРАҚАЛПОҒИСТОН РЕСПУБЛИКАСИ кенгаши йиғилишида Ҳаракатнинг шаҳар ва туман кенгашлари томонидан ўтган йил давомида амалга оширилган ишлар ҳисоботи тингланиб, эришилган



ютуқлар ва йўл қўйилган камчиликларни бартараф этишга доир масалалар кўриб чиқилди.

Қорақалпоғистонлик «Kamolot»чилар ўтган йил давомида ёшларнинг ижтимоий-сиёсий фаоллигини ошириш, маънавий-маърифий, тадбиркорликни ривожлантириш, истеъдодли ёшларни қўллаб-қувватлаш, спорт ва соғлом турмуш тарзини тарғиб этиш йўналишларида уч мингдан ортиқ тадбир ташкил этиб, уларга беш минг нафардан зиёд ўғил-қиз қамраб олинди.

«Камалак юлдузлари» болалар ижодиети фестивалининг республика босқичида тўққиз нафар қорақалпоғистонлик ўғил-қиз биринчи ўринни эгаллади. «Юрт келажаги» танловида тўрт нафар, «Йилнинг энг фаол ёш журналисти» танловида икки нафар, «Янги нигоҳ» видеороликлар танловида икки нафар, «Менинг бизнес гоям» танловида тўрт нафар, «Ёш тадбиркор — юртга мададкор» танловида олти нафар йигит-қиз ғолиб бўлди.

Йиғилишда «Kamolot» ЁИХ Марказий Кенгаши раисининг биринчи ўринбосари Ф.Муҳаммаджонова, Қорақалпоғистон Республикаси Жўқорғи Кенгеси кўмита раиси С.Турманов, Қорақалпоғистон Республикаси Вазирлар Кенгаши раиси ўринбосари М.Алеуов қатнашди.

**Клара ХУДОЙБЕРГАНОВА,**  
**«Kamolot» ЁИХ Қорақалпоғистон Республикаси кенгаши матбуот хизмати ходими**

**НАМАНГАН** Ёшлар марказида бўлиб ўтган Ҳаракатнинг вилоят кенгаши йиғилиши таҳлилий ҳисоботлар билан бошланди.

Ўтган йили вилоят миқёсида «Ўзбекистон Республикасида 2014 йилда ёшларга оид давлат сиёсатини амалга оширишга қаратилган қўшимча чора-тадбирлар дастури» ижроси юзасидан кўплаб лойиҳалар, кўрик-танловлар, спорт мусобақалари, давра суҳбатлари, учрашувлар, ўқув-семинарлар ташкил этилди. Қувонарлиси Ҳаракат томонидан ўтказилаётган бундай тадбирларнинг сифати ва қамрови йилдан-йилга ортиб бормоқда. Ўтган йилнинг ўзиде кенгаш тизимида уч мингдан зиёд тадбир ташкил этилиб, уларга 655 мингдан зиёд йигит-қиз қамраб олинди. Наманган Ёшлар маркази ва ҳудудлардаги олти «Ёшлар ижтимоий хизматлари» марказларидаги 27та тўғрақ ва ўқув курсларида уч минг нафар ўғил-

қиз турли касб-хунарни ўрганиш учун бепул ўқитилди.

Ютуқлар ўзимизники, хатолардан тўғри хулоса чиқариб, камчиликларни бартараф этайлик деган мақсадда ташкил этилган йиғилишда Ҳаракатнинг қўйи тизимларидаги камчиликлар атрофлича таҳлил этилиб, вазифасига масъулиятсизлик билан ёндошган масъул ходимлар қатъий огоҳлантирилди.

Кенгаш аъзолари келгуси фаолият учун таклиф ва мулоҳазаларини билдирди. Улардан келиб чиққан ҳолда вилоят кенгашининг режаси тузилди.

**Зулайхо ЗАЙНИДДИНОВА,**  
**«Kamolot» ЁИХ Наманган вилояти кенгаши матбуот хизмати ходими**

**АНДИЖОН** шаҳридаги Халқаро ҳамкор бизнес марказида вилоят кенгашининг 2014 йил сарҳисоби ва жорий йилга мўлжалланган иш режаларига бағишланган йиғилиш бўлиб ўтди. Унда «Kamolot» ЁИХ Марказий Кенгаши раиси ўринбосари Сарвар Ашуров, Андижон вилояти ҳокими ўринбосари Шаҳзод Турсун



нов, Ҳаракатнинг маҳаллий кенгашлари ходимлари, ҳамкор ташкилотлар вакиллари ҳамда фаол ёшлар қатнашди.

Дастлаб Ҳаракатнинг вилоят кенгаши раиси ва раис ўринбосарларнинг 2014 йилда амалга оширилган ишлар юзасидан ҳисоботи тингланди. Ҳаракатнинг айрим маҳаллий кенгашлар фаолиятида йўл қўйилган камчиликларга тўхталиб, мавжуд муаммолар муҳокама этилди, тегишли хулосалар чиқарилди.

Кун тартибидаги барча масалалар юзасидан тегишли қарорлар қабул қилинди.

Йиғилиш сўнгиде Ҳаракатнинг 2014 йилдаги фаолият рейтингини натижасида юқори учликка кирган Балиқчи, Улғунор, Избоскан туманлари кенгашлари раислари вилоят ҳокимлиги томонидан муносиб тақдирланди.

**Лазизбек ЙЎЛДОШЕВ,**  
**«Kamolot» ЁИХ Андижон вилояти кенгаши матбуот хизмати ходими**

Бугунги кунда Ҳаракатнинг **САМАРҚАНД** вилояти кенгаши тизимида 1693та бошланғич ташкилот фаолият кўрсатаётган бўлиб, улар 14-30 ёшгача бўлган 335546 нафар йигит-қизни бирлаштирган. 210500 нафардан зиёд ўғил-қиз «Камалак» болалар ташкилотига аъзо. Маз-

кур маълумотлар вилоят кенгашининг 2014 йил якунига бағишланган ҳисобот йиғилишида қайд этилди.

Ҳисобот даврида ёшлар ташкилоти самарқандлик ўғил-қизларнинг ижтимоий фаоллигини ошириш, маънавий-маърифий, тадбиркорликни ривожлантириш, истеъдодли ёшларни қўллаб-қувватлаш, спорт ва соғлом турмуш тарзини тарғиб этиш йўналишида уч мингдан зиёд лойиҳа, танлов, акция ва, давра суҳбатлари ташкил этиб, бир миллион нафарга яқин ёшни қамраб олди.

Ўтган йил вилоят ёшларидан икки нафари Президент стипендияси, яна ўн бир нафар тенгдошимиз «Ўзбекистон белгиси» кўкрак нишони, «Kamolot» стипендияси соҳиби, Осиё ўйинлари ғолиби бўлди.

Кенгаш йиғилишида ютуқлар билан бирга хато ва камчиликларга ҳам тўхталиб ўтилди.

Йиғилиш сўнгиде кун тартибида кўрилган масалалар юзасидан тегишли қарорлар қабул қилинди.

**Ойбек ХАЙДАРОВ,**  
**«Kamolot» ЁИХ Самарқанд вилояти кенгаши мутахассиси**

**ТОШКЕНТ** шаҳар кенгаши йиғилишида ҳам ёшлар масаласига доир вазифалар ижроси таҳлил қилинди.

2014 йилда Ҳаракат пойтахтлик ўғил-қизларнинг ижтимоий-сиёсий фаоллигини ошириш, маънавий-маърифий, тадбиркорликни ривожлантириш, истеъдодли ёшларни қўллаб-қувватлаш, спорт ва соғлом турмуш тарзини тарғиб этиш йўналишларида етти мингдан зиёд тадбир ташкил этиб, бир миллион нафардан зиёд ёшни қамраб олди. Йиғилишда бу рақамлар навқирон авлоднинг камолотида қанчалик муҳим аҳамият қаратилди. Тадбирларнинг сонига эмас, самарадорлигига қараб баҳолаш зарурлиги таъкидланди.

Ҳаракатнинг йирик лойиҳаларидан бири ҳисобланган «Ўзбекистон Республикаси Конституцияси — мамлакат та-

раққиети ва жамият фаровонлигининг ҳуқуқий кафолати» тарғибот лойиҳаси 33та олий таълим муассасаси, 120та ўрта махсус, касб-хунар таълим муассасаси, 281та умумтаълим мактаби, 11та корхона ва ташкилотда ўтказилди. Ёшларни шаҳар ва туман ҳокимликлари фаолияти билан яқиндан таништириш, улар орасида учраётган муаммоларни бартараф қилиш, таклиф ва ташаббусларини қўллаб-қувватлаш мақсадида ўтказилган «Ҳоким ва ёшлар» учрашувларига ўн уч минг нафардан зиёд ўғил-қиз жалб қилинди. Бу кўрсаткич ўтган йилгига нисбатан икки баробар кўпдир.

Ўтган даврдаги сарҳисоб шуни кўрсатдики, барча лойиҳалар Президентимизнинг 2014 йил 6 февралдаги «Ўзбекистон Республикасида ёшларга оид давлат сиёсатини амалга оширишга қаратилган қўшимча чора-тадбирлар тўғрисида»ги қарори билан тасдиқланган Дастур асосида ташкил этилди.

Ҳаракатнинг барча йўналишларда амалга оширилган ишлар ҳисоботи тинглангач, кўрилган масалалар юзасидан тегишли қарорлар қабул қилинди.

**Азиза РАҲМАТУЛЛАЕВА,**  
**«Kamolot» ЁИХ Тошкент шаҳар кенгаши матбуот хизмати ходими**

# КАРИМ БОБОНИНГ АСРИЙ ЎГИТЛАРИ

(Давоми, бошланиши 1-саҳифада)

“Тошмачит” маҳалласида Карим бобонинг ҳовлисини ҳамма билади. Остона ҳатлаб кирганимизда, у киши боғда кўчатлар тагини юмшатаётган экан. Зимдан кузатдик. Бобо чакмонининг этагини белбоғига тугганча ҳафсала билан, кўшиқ хиргойи қилиб ишляпти. Хайрон бўлдик. Наҳотки, шу одам 101 ёшда бўлса?! Карим бобо ҳалиям бардамбақувват. Бир жойда ўтиргиси келмайди. Доим ҳаракатда. Баҳор келди дегунча боғига ошиқади. Атрофни яшнатгиси келади-да.

Куюқ салом-алиқдан сўнг Карим бобо қўлидаги кетмонни қўйиб, гап бошлади:

— Баҳорни яхши кўраман. Ҳар йили кўкламни Мунаввар момонг билан гул-гул яшнаб кутиб олардик. Бу баҳорни эса усиз қаршиляпман. Момонгга атаб гуллар экаман, болам.

Карим бобо жуфти ҳалоли билан бирга етмиш йилдан ортиқ яшади. Унга қаттиқ боғланиб қолгани табиий. Иккови беш ўғил, тўрт қизни тарбиялаб вояга етказди. Касбу корли, уйли-жойли қилди. Бугун фарзандлари турли соҳаларда меҳнат қилиб, эл корига ярамоқда. Тўнғичлари неварали бўлиб, пенсияга ҳам чиққан.

— Невара-чевараларимнинг сонини билмайман, — дейди табассум билан Карим бобо. — Қайси куни

ўғлим Матёқубжон санабди. Йиғилсак, бир қишлоқ бўларканмиз. Худога шукр, ҳаммамиз соғ-саломатмиз. Мен ҳозиргача дўхтирга муҳтожлик сезмайман. Ҳаётда оғир кунларни ҳам кўрдим. Уруш йилларида хув, Қоровулбозорнинг олис Жарқоқ чўлида чўпонлик қилиб, фронт ортида хизмат қилганман. Очлик, қаҳатчиликни эсласам, ҳалиям этим увишади. Нон ўрнида кунжара еб, шишиб ўлган одамларни кўрганман. Шу ёшга қираман деб сира ўйламагандим. Худонинг марҳамати бу!

— Одам боласининг кўнгли пок бўлса, хонадониди гиди-бидига ўрин қолмаса, барчага меҳр-саховат кўрсатса, Яратганим умрини узоқ, саодатли қилар экан, — давом этади бобо. — Энг ёмон одат — гина сақлаш. Юрагида кек сақлаган киши ич-этини емиради, умрини адоий тамом қилади. Тўғри, ҳаётда қаранса бўлиши мумкин. У оқу қорандан иборат. Лекин, айниқса, ёшлар бир гапни яхши ўқиб олишини истайман: биз бир-биримизга меҳрибон, бағрикенг, кечиримли бўлишимиз керак. Одамлардан, маҳалладошларимдан қўлимдан келганча ёрдамимни, яхши сўзимни аямайман. Каттаю кичикни қадрлайман. Мана энди ўзим ҳам шу юртда азиз инсон бўлиб юрибман. Юртбошимизнинг боши омон бўлсин, “Шухрат” медалини олаётганимда кўнглим тоғдай кўтарилди. Мамлакатнинг олис қишлоғида яшаётган бир чўпон ота давлат раҳба-



рининг назаридан четда қолмагани умримга яна умр кўшди. Юртимиздаги тинчлик, хотиржамлик, фаровонлик, биз, кексаларнинг доимо эъзозда ва эътиборда бўлганимиз учун Президентимизга минг раҳмат!

Карим бобо кўярда-қўймай, уйига таклиф қилди. Бу ер гулзорнинг ўзгинаси. Қулочдек-қулочдек гултувакларда униб-ўсган турли анвойи гулларнинг хуш бўйидан баҳра олади киши. Саватдаги беданаю булбулларнинг ёқимли чуғур-чуғури кўнглингизга ором бағишлайди. Жавонда кўплаб китоблар, газета ва журналлар тахламини кўриб, ҳайратимиз янада ошди. Карим бобога савол назари билан қарадик.

— Ҳа, кенжа эварамга дўқондан

қайси нашрларни олиб келишни ёзиб бераман. Мутолаани сира қанда қилмайман. Баъзан телевизор кўраман, радио тинглайман. Хўп ажойиб замонда яшайпмиз-да, қизим, хурлик туфайли бозорларимиз тўкин, нима изласанг, топасан. Фақат меҳнат қилсанг, бас. Ўтган умримни эсласам, ҳозиргиси тош босади. Юртбошимиз ўз халқига ғамхўр. Шуларнинг қадрига етмоқ керак. Ўқийман, десанг шинам, ёруғ мактаблар, касб ўрганаман, десанг коллежлар, олий маълумотли бўламан десанг, қанчалаб университету институтларнинг эшиклари очик. Вақтни увол қилмаслик даркор. Шунда вақт сени ҳам увол қилмайди. Юз билан юзлаштиради!

Дарҳақиқат, Карим бобо Назаров айтганидек, давлатимиз раҳбари ғамхўрлигига жавобан ёшларимиз билимли, маънавияти юксак, Ватан учун жонини фидо қиладиган инсонлар бўлиб етишишлари зарур. Шунда кўзланган мақсад — келажаги буюк давлат барпо этилади. Яна бир жиҳат — аждодларимиз қолдирган бебаҳо маънавий меросни кўз қорачигидек асраб, ўрганишимиз, меҳроқибатли, саҳий ва фазилатли бўлишимиз лозим.

— Шунда узоқ умр кўрасиз, ҳаётингиз мазмунли кечади, — дейди Карим бобо.

Сабр-қаноатли, бағрикенг нуроний отахон билан хайрлашар эканмиз, дунёга ўз бўй-бастини янада яққолроқ намоён этаётган юртимиз ана шундай табаррук отахонлар дусосидан ривож топиши, гуллаб-яшнашига амин бўлдик. Зеро, қариси бор уйнинг париси бор, деб бежиз айтилмаган.

Лайло ҲАЙИТОВА,  
«Turkiston» мухбири

## Madaniyat maskanlarida

Ўзининг такрорланмас ижоди, гўзал санъати ва маҳорати билан XV асрдаги Ҳирот адабий, бадиий, илмий ҳаёти, санъат ва маданияти ривожига муносиб ҳисса қўшган Камолиддин Беҳзод буюк рассом, наққош ва миниатюрарчи сифатида бутун дунё маданияти тарихида ўчмас из қолдирган. Сафдошлари ва издошлари орасида давр руҳини нозик идрок қила олиш қобилиятига эга мутафаккир аънавий лавҳаларни беришдаги ўзига хос услуби билан неча асрдирки, халқимиз ардоғида.

## ЭКСПОЗИЦИЯЛАРДА ШАРҚ МИНИАТЮРАСИ ФАЛСАФАСИ



Бугун сиз билан ана шундай буюк рассом, Шарқ миниатюра мактабининг асосчиси Камолиддин Беҳзоднинг хотирасига атаб барпо этилган мемориал боғ-музейга саёҳат қиламиз.

Дарвозадан кирар экансиз,

бино замонавий меъморлик андозалари асосида қурилганига гувоҳ бўласиз. Музей олдида Ўзбекистон халқ рассоми, ҳайкалтарош Жалолиддин Миртожиевнинг “Камолиддин Беҳзод” ҳайкали ўрнатилган.

Икки қаватли музей экспозицияси майдони 580 квадрат метрни ташкил этади.

Таваллудининг 545 йиллиги муносабати билан алломанинг ҳаёти ва ижодини, китобат, хаттотлик, миниатюра санъатини акс эттириш ва кенг тарғиб қилиш, чуқур инсонпарварлик руҳи билан суғорилган тарихий аъналаримиз асосида ёш авлодни ватанпарварлик руҳида тарбиялаш мақсадида ташкил этилган музей илк бор 2010 йилда томошабинлар учун ўз эшиklarини очган.

Музей экспонатлари орқали Камолиддин Беҳзод ва унинг шогирдлари ижоди, юртимизда фаолият кўрсатаётган миниатюра мактаблари ҳамда

қадимдан ривожланиб келган ёзув маданияти, китобат тарихи ҳақида маълумот олиш мумкин. Шунингдек, миниатюра санъатида ўрта асрларда Шарқнинг эстетик тамойиллари, ижодкорлик ҳис-туйғулари ифода этилган. Уларда борлиқнинг қандайлиги, ҳатто қандай бўлиб туриши эмас, қандай бўлмоғи зарурлигини тасвирлаш муҳим эди. Шу сабабли, асарлардаги тасвир Европа санъатидан фарқли равишда бошқа вазифани адо этади ва у реаллик билан боғланмаган. Уларда одоб-ахлоқ меъёри, эстетик идеал, мавзу ва композициянинг қонун доирасида бўлиши муҳим ўрин эгаллаган. Ушбу маданият маскани фонди ёзма манбаларга бой бўлиб, ўрта асрлардан XIX асргача бўлган даврда битилган юздан ортиқ қўлёзма, икки юздан ортиқ тошбосма китоб, юздан зиёд миниатюра ва хаттотлик асарларига эга.

Музейни айланар экансиз, Шарқ миниатюра санъати аъналарини давом эттираётган замондош мусаввирларимиз маҳорати ва асарларидаги пластик тимсолларнинг ўзгача жозибасига маҳлиё бўласиз. Асарларда қайта тикланган Шарқ миниатюраси на-

муналари бу санъатнинг умрбоқийлигидан ва умумжаҳон бадиий жараёнларининг муҳим таркибий қисми эканидан далолат беради.

Жумладан, биринчи қаватдаги экспозициясидан таниқли миниатюрарчи рассом ва хаттотларимиз Фахриддин Раҳматуллаев, Хайриддин Муҳиддинов, Кошиб Амонов, Хуршид Назиров, Баҳодир Ҳожиметов, Владимир Ан, Тоиржон Болтабоев, Ҳабибулло Солиев, Маъруф Салимовнинг ишлари жой олган.

Бинонинг иккинчи қавати эса кўргазмалар ўтказишга мўлжалланган.

Мемориал боғ-музей республикамизнинг муҳим илмий-тадқиқот, маданий-маърифий марказларидан бири ҳисобланади. Улуғ устод ҳаёти ва ижодига эътибор айниқса, юртимиз мустақилликка эришгандан сўнг давлат аҳамиятига молик масалалардан бирига айланди.

Музейнинг асосий фаолият йўналиши буюк мусаввирнинг ижодий мероси, Шарқ миниатюра, хаттотлик, наққошлик ва умуман китобат мактаблари тарихини ўрганиш ва уларнинг энг яхши намуналарини тарғиб қилишдан иборат.

Парвина ОМОНОВА



Рустам Назарматов олган суратлар

# ҲАЁТ АСЛИДА ЎРГАНИШДАН ИБОРАТ

**(Давоми, бошланиши  
1-саҳифада)**

— **Сухбатимизни журналистика эшиги остонасига ташлаган илк қадамнингиздан бошласак.**

— Ҳарбий хизмат пайтида соҳа газетасида фотомухбир бўлиб ишлаганман. Шу тарих журналистикага қизиқиш уйғонди. Ҳарбий хизматни тамомлагач, ҳеч иккиланмай, ҳозирги Ўзбекистон Миллий университетининг журналистика бўлимига ҳужжат топширдим. Ўқишга киргач, ўзимни телевидениеда ҳам синаб кўриш истаги уйғонди. Адабий-драматик кўрсатувлар муҳарририятига ишга кирдим. Фаолиятимни «Ўн дақиқа поэзия» кўрсатуви учун экран ортида 4 — 8 мисра шеър ўқишдан бошлаганман. Кўринишим телеэкранга мос тушгани учун турли кўрсатувларга бошловчи, қолаверса телевизион спектакллар, видеофильмларга актёр сифатида ҳам таклифлар кўпайди. Халқимиз қалби ва хотирасидан чуқур жой эгаллаган устозларимдан олган билимларим билан ёш дикторлар орасида эълон қилинган танловдан муваффақиятли ўтиб, Ўзбекистон телевидениесининг дикторлар гуруҳига ишга олиндим. Ҳозирда шу гуруҳнинг раҳбари сифатида фаолият кўрсатиб келяпман.

— **Миллий телерадиокомпания тизимида ёш мутахассисларни тарбиялашда устоз-шогирд аънанаси қандай аҳамиятга эга?**

— Ишонч билан айтишим мумкинки, телерадиокомпаниямизда устоз-шогирд аънанаси ҳеч қачон тўхтаб қолган эмас. Наинки бошловчилар, балки ёш муҳаррирлар, режиссёр, тасвирчи-оператор, техник инженерлар ҳам шу аънананинг мевалари, дейиш мумкин. Улар соҳа сир-асрорларини пухта ўрганиш учун малакали устозларга бириктирилади ва шу аснода, тажриба ортиради. Бу эса олий таълим муассасасини тамомлаган ёш кадр учун катта ижодий мактаб вазифасини ўтайди.

Бугунги кунда мен ҳам кўплаб ёшларга устоз сифатида сабоқ бераман. Хусусан, «Toshkent», «Madaniyat va ta'rifat» телеканалларида маҳорат дарсларини олиб бораман. Шогирдларимга доимо ҳар бир сўзнинг сал-

моғини ҳис қилиш, минглаб томошабинлар назарини юракдан ўтказиш, аудиторияга самимият билан мурожаат қилиш зарурлигини уқтираман. Шундай сўзлар борки, ёзилиши бир хил бўлсада, ҳар хил талаффуз қилинади. Баъзан урғуни нотўғри қўйиш натижасида сўзнинг маъноси бутунлай ўзгариб кетиши мумкин.

Маҳорат дарсларида шогирдларимнинг қайси кўрсатувни олиб боришига қараб аввал матнини ўзим намунавий тарзда ўқиб бераман, сўнгра ўқитиб кўраман ва шу аснода уни диққат билан кузатиб, хатоларини тузатиб бораман. Қайсидир сўзни нотўғри талаффуз қилса, биргаликда тўғрилаймиз.

Бу жараён мени ўз устимда кўпроқ ишлашга ҳам ундайди — ханузгача китоб, мутолаа қилиб, ўқиб-изланаман, гоҳида муайян сўзларнинг маъносини тилшунослардан сўрайман. Телекўрсатувларни мунтазам кузатиб бораман.

— **Телеэкрандаги янги овоз соҳиблари, шу жумладан, шогирдларингизнинг қобилияти, меҳнатига қандай муносабатдасиз?**

— Бугунги ёшларнинг ҳавас қилса арзийдиган жиҳатлари бор. Масалан, улар бир нечта хорижий тилларда худди она тилидагидек раво гапира олади. Қувонарлиси, орамизда тил билганлар сафи кенгайиб бормоқда. Шогирдларимнинг ўз фаолияти давомида замонавий ахборот-коммуникация технологиялари, фан-техника ютуқларидан унумли фойдаланаётгани ҳам яхши.

— **Сухандоннинг касб этикасига доир фикрларингиз биз учун қизиқ.**

— Бугунги кунда тележурналист кўрсатувга муаллиflik қилиб, бир пайтнинг ўзида муҳаррир ҳам бўлиши мумкин. Бироқ соҳадаги бундай универсаллашув жараёнида ҳам бошловчининг масъулияти сира камаймаслиги керак. Чунки телевизорда биз айнан унинг нигоҳига қараб фикр юритамиз, телебошловчининг овоз параметрлари, нутқ маданияти, кўриниши томошабин учун ҳамиша намуна бўлиши зарур. Бориники, бошловчи биргина нотўғри талаффузи ёки ноўрин ҳаракати билан кўрсатувнинг бутун ижодий гуруҳи — муҳаррир, режис-

сёр, оператор — ўнлаб ҳодимнинг меҳнатини чиппака чиқариб қўйиши мумкин. Аксинча, сўзни юрагига қадар етказиб бера олса, томошабин учун сеvimли қаҳрамонга айланади. Шундай кўрсатувлар борки, бошловчиси ўзгаргандан кейин одамлар уни кўрмай қўйган. Мақсадимиз содир бўлган воқеа-ҳодисани жамоатчиликка етказиш, унга нисбатан аудиториянинг фикрини тўғри шакллантиришдан иборат. Айтайлик, ахборотни шунчаки истар-истамас ўқиб кетаверадиган бўлсам, қулоққа кирмайди, демек, то-

## Абдумўмин ЎТБОСАРОВ

**1960 йили** Тошкент шаҳрида туғилган.  
**1980–1986 йилларда** Ўзбекистон Миллий университетининг журналистика факультетида, **1987–1989 йилларда** Москвадаги Телевидение, радио ҳодимларни тайёрлаш институтининг телевидение диктори факультетида таълим олди.

**2002 йилда** «Ўзбекистон Республикасида хизмат кўрсатган маданият ходими» унвони билан мукофотланган. **2014 йилда** «Ўзбекистон халқ артисти» унвони билан тақдирланган. Оилали. Икки нафар фарзанди бор.

мошабин ўша воқеадан хабар топмайди. Агар матнни юракдан ўтказиб, муносабат билдириб ўқисам, томошабинга тез етиб боради. Чунки телевизорни ҳар ким ҳар хил шароитда кўради — кимдир уйда ёнбошлаган ҳолда, кимдир иш вақтида идорада. Шунинг учун телевидение тили барчага — етти ёшли боладан етмиш яшар кексага, академигу тадбиркорга бирдай тушунарли, содда ва халқчил бўлиши керак.

— **Қайси касбда бўлмасин, инсоннинг унибўйиши, юксалиши, умуман, ҳаётда ўз ўрнини топишида устозларнинг алоҳида ўрни бор. Сизга тўғри йўл кўрсатган, ўгитлари қалбингизда муҳрланган инсонлар ким?**

— Ўзбекистон Республикасида хизмат кўрсатган артист Ўктам Жобиров, Ўзбекистон Республикасида хизмат кўрсатган ёшлар мураббийи Даврон Зуннунов, Ўзбекистон халқ артисти Мирзоҳид Раҳимовнинг ўгитлари, маҳорати хотирамдан муносиб ўрин олган. Ўзбекистон Республикасида хизмат кўрсатган артистлар Галина Мельникова ва Насиба Иброҳи-



Бугунги кунда МТРК тизимидаги кўпгина марказий телеканал рақамли форматда эфирга узатилмоқда. Натижада айна дамда юртимиз аҳолиси барча марказий телеканалларни стандарт тиниқликда кўриш имкониятига эга. Биргина «O'zbekiston» телеканалининг медиамаҳсулотлари юзга яқин давлатларга узатилади. Моддий-техник база мустаҳкамланиши ўз ўрнида бошловчилар зиммасига ҳам залворли масъулият юклайди.

— **Телебошловчи сифатида ижод тушунчасини қандай таърифлайсиз?**

— Касбимдан келиб чиқиб айтсам, матн таъсирчанлигини кучайтириб, жонлантириб беришга хизмат қиладиган услубларни топиш, изланиш, бошқачароқ оҳангда ўзгартириб ўқишни ижод деб тушунаман. Бошловчининг вазифаси тайёр матнни ўқиб бериш эмас, тилига тушмаган ғализ ўринларни тўғрилай кетиш, хатоларни ушлаб, филтрлаб қолишдан иборат. У матндаги сўзларни эмас, умумий матнни ўқиши керак. Талаффузда нуқта, вергул ва яна бошқа тиниш белгилари ҳам албатта инобатга олинади, оҳанг сақлаб қолинади.

Ҳаёт асли ўқиб-ўрганиш, изланишдан иборат экан, демек, мен етукман, деган бошловчи ўша кунёқ, бу соҳани тарк этса бўлади. Зеро, ҳар битта сўзнинг салмоғини юрагига жо эта олган бошловчигина халқ хурмати, эътиборига сазовор бўлади, мухлислар кўнглидан жой олади.

**«Turkiston» муҳбири  
Дилшод РЎЗИҚУЛОВ  
суҳбатлашди.  
Носир ҲАЙДАРОВ  
олган сурат.**

мованинг устоз сифатида берган тавсиялари менга ҳамиша кўмак бериб келади.

— **Телевидение тараққиёти, унинг моддий-техника базасини янада мустаҳкамлаш борасида Миллий телерадиокомпаниямиз тизимида олиб борилаётган ишлар ҳақида тўхталсак.**

— Собиқ тузум даврида энг сара телевизион техник усқуналар биринчи галда «Бойкўнғир» космодроми ва «Останкино» телерадиокомпаниясига, уларда ишлатилиб эскирган жиҳозлар эса қўшни республикаларга бериларди. Шундан кейин улар вилоят телерадиокомпанияларига жўнатиладди. Ҳозир эса шароит мутлақо бошқача. Ҳатто, худудий телерадиокомпанияларимиз энг замонавий жиҳозлар билан таъминланган. Бориники, эндиликда махсус мосламага жойлаштирилган камералар орқали юқоридан исталган нуқта суратга олинапти. Энг муҳими, ўша камера ердан туриб бошқарилади. Бу халқ сайиллари, катта тадбирларни тасвирга олишда, айниқса, қўл келмоқда.

## Imkoniyat

## АРМОН БЎЛМАСИН

Асомиддин ота дўхтир хузуридан чиқиб, анкетани рўйхатхонада қолдирди-да, ташқарида кутиб турган машинага ўтирди.

— Бобожон, дўхтирлар нима деди? — сўради набираси Умиджон. — Дори ёзган бўлса, қоғозини беринг, ҳаммасини ўзим оламан. — Йўқ, шарт эмас. Парҳезга риоя қилиш керак, дейишди. Энди ошни камроқ еймиз, шекилли...

— Қизиқ, — ўйга толди отахон, — одамнинг ёши ўтган сари қаяқдаги касалликлар келиб чиқарар экан-да. Оддий қаймоқ нима деган гап? Шундан озроқ тановул қилса ҳам, қонда қанд миқдори ошиб кетармиш. Қолган таомларнинг ярмидан кўпи холестерин макони экан. Дўхтир қон қуюлмасин, деб тайинлади.

Тоғни урса талқон қилади-ган йилларим бошқача эди-да. Йиллаб дўхтирга мурожаат қилмаган эдим. Парҳез нималигини билмасдим. Тўхта, ўшанда қонимда қанд миқдори қанча эди? Қон босимимчи? Ҳа, эсимга тушди: у даврда бунақа тахлиллар бўлмаган, яъни ўлчатмаган эди. Нега? Ахир, шикоят бўлмагандан кейин нега ўлчатади?

Ҳа, куч-қувват инсонга меҳмон экан. У пайтлари одам-

лар умрининг охиригача бирдай юраман, деб ўйлар экан. Ёш ўтгандан кейин суяклар емирилди, ўтирган жойдан туришда таянишга, баъзан кўмакка муҳтож бўларкансиз. Қаранг, ёшлиқда зинадан кўтарилганда икки-уч поғондан югуриб ўтардик. Энди зинапояли жойга бормай қўя қоламиз.

Танангда қувват бўлганида гапларинг ҳам дадил чиқади. Одамлар шу шижоатингга қараб муомала қилади, ҳар бир сўзинг билан ҳисоблашади. Энди эса, бирор жойга мурожаат қилсанг, ҳурмат-эҳтиром билан “Келинг, отахон” деса ҳам, “Бу чолнинг нима дарди бор экан?” дегандай эшитилади.

Ёшлиқнинг қадри кексаликда билинади. Нега мен ота-

ларнинг дуосини олиш учун ҳаракат қилмадим? Тўғри, улар мендан рози-ризо бўлиб кетди, армон қилмайман. Лекин бундан ҳам кўп яхшиликлар қўлимдан келарди-ку?!

Бир сафар бемор ётган онасини кўргани борганди. Эртдан кечгача она-бола суҳбатлашиб ўтирди. Оқшом тушганда “Ўғлим, келин нариги ўйга жой қилди, бориб ётгин” деди. “Йўқ, ойижон, сиз билан бир ўйда ётмоқчиман” деди. “Болам, мен сени безовта қилмай дейман, бу ер ноқулай” деганда, “Ҳечқиси йўқ, ётавераман” деди. Она билан келин бир-бирларига қараб жойни шу ерга солди. Кўп ўтмай, уйкуга кетди. Эрталаб туриб қараса, онаси каравотда йўқ. Она билан бир ўйда ётибман, деган ўйлар сароб бўлиб чиқди. Кейин билса, онаси “Болам безовта бўлмасин” деб у уйкуга кетгач, нариги хонага ўтиб ётибди. Бу сафар ҳам гафлатда қолибди...

Одамларга, маҳалладошларга, ўзи ишлаган соҳа ходимларига янаям кўп хизмат қилиши мумкинмиди? Ёшлиқда “Ҳали яхшилик қилиб ул-

гураман” деган фикрда юраверибди. Умр деганлари физ этиб ўтиб кетаркан-у, билмай қоларкансиз. Ахир, инсон ўзгаларнинг ҳолатига қанча кўп яраса, шунча енгил тартади. Афсуски, бу хулосага ёши улғайганда, кучдан қолган паллада келди.

Қани энди, ҳозир яшариб қолсам, қандай ҳаёт қуришни ўзим билардим. “Яхшиликлар дафтари” деган ёндафтар тудардим. Ҳар куни шу дафтарга эзгу ишларимни ёзиб борардим. Сўнг шу дафтаримни болаларимга эсдалик учун берардим. Эзгу ишлар деганда кимнидир юкини кўтариш, мушкулини ҳал қилишгина эмас, одамлар кўнглига яхши фикрлар, ғоялар ҳадея этиш ҳам тушунилади.

Мана, ҳозир “Қамолот” ёшлар ижтимоий ҳаракати кўп яхши ишларга дохил бўлмоқда. Одамлар, айниқса, кексалар «қамолот»чилардан мамнун. Ахир, кўпнинг дуосини олишдан кўра савобли иш борми бу дунёда?! Савоб эса инсон қалбида яхши туйғулар ҳосил қилади. Танасига куч-қудрат бағишлайди. Шукр,

замонамиз гўзал, ҳаётимиз фаровон. Фан-техника жадал равнақ топмоқда. Илгари бир неча кунда бажарилган юмушлар энди компьютер деган мўъжизада санокли дақиқаларда ечим топяпти. Инсон саломатлигини сақлаш, умрини узайтириш борасида оламшумул кашфиётлар кўз ўнгимизда ҳаётга татбиқ этиляпти.

Лекин дунёдаги энг мукамал ихтиро ҳам ўтган умрни қайтариб беролмайди, шунинг учун ёш улғайганда, танда куч-қувват камайганда армон, афсус бўлмаслиги учун навқиронлик пайтида кўпроқ эл-юрт хизмати адо этиш пайида бўлиш керак. Кўпроқ ўрганиб, китоблар билан ошно тутиниб, ҳаётини тажрибани бойитиш керак.

Бунинг учун гўзал Ватанимизда ажойиб муҳит, қулай шарт-шароит яратилган. Ҳамма гап бундай имкониятни қўлдан бой бермай, ҳаракат қилишда. Асомиддин ота машинадан тушиб, набираси Умиджонга унга аталган гаплар борлигини айтди. Набирасига бу гапларни айтмас, ким айтади!

**Шухрат ЖАББОРОВ,**  
Ўзбекистон  
Республикасида хизмат  
қўрсатган журналист



## Баркамол авлод — иқтидорга қанот

Мамлакатимизда ёш авлодни ҳар томонлама қўллаб-қувватлаш, уларнинг бўш вақтини мазмунли ташкил этиш, иқтидорини юзага чиқаришда «Баркамол авлод» болалар марказларининг ҳам ўрни алоҳида аҳамиятга эга.

Вазирлар Маҳкамасининг 2011 йил 28 февралдаги «Мактабдан ташқари таълим тизимини янада такомиллаштириш чоратадбирлари тўғрисида»ги қарори асосида республикамизнинг барча шаҳар ва туманларида ташкил этилган каби Шаҳрихон туманида ҳам 2011 йилдан буён «Баркамол авлод» болалар маркази ўз фаолиятини олиб

бормоқда. Маскан зарур жиҳозлар, замонавий ўқув анжомлари билан таъминланган.

Айни пайтда ушбу даргоҳда 25 йўналиш бўйича тўғарақлар фаолият кўрсатаётир. Унда 900га яқин ўғил-қизга 30дан зиёд устоз ва мураббий ҳунар сирларини ўргатаётир. Шинам ва ёруғ хоналарда бўш вақтини мазмунли ўтказётган ёшлар вилоят ва республика миқёсидаги

танлов ва фестивалларда қатнашиб, ғолибликни қўлга киритмоқда. Жумладан, ўтган йили мазкур даргоҳ ўқувчиси Вазира Зайнобиддинова «Мустақиллик — менинг тақдиримда» мавзусидаги «Баркамол авлод» республика болалар фестивалида «Ёш авиасоз» ва «Ёш мусавир» йўналиши бўйича ғолиб бўлгани фикримизнинг ёрқин тасдиғидир.

Бугун марказда ташкил этилган қулайликлар ўғил-қизларнинг баркамол улғайиши ва ижодкорлик қобилиятини намойён этишда муҳим омил бўлмоқда.

**Миролим ИСАЖОНОВ**  
Андижон вилояти

## Ma'naviyat

## КИТОБ ЖАВОНИНГИЗНИ УНУТМАНГ

Адабиёт сўзи абадий сўзига ҳамоҳанг, бир-бирига чамбарчас боғлиқ. Бадиий адабиёт — ота-она, устоз каби руҳимизга кириб борувчи, инсоннинг ҳаётнинг сўқмоқларидан қийналмай ўтишида ёрдам берувчи, дардига малҳам бўлувчи дўст, десак, хато бўлмас.

«Ўткан кунлар»да Кумушнинг Отабекка «Фузулий, яхши китоб, мен ҳам ёлғиз қолган кезларимда бу китобдан бошимни ололмас эдим» деган сўзларини эсланг.

Мактаб даврида адабиёт ўқитувчимиз «Ким кўп китоб ўқийди?» мусобақаси ташкил этиб, ғолибларга мақтов ёрлиқлари, китоблар совға қиларди. Энди ўйласам, ўқитувчимизнинг мақсади кўп китоб ўқитиш эмас, балки бизни адабиётга ошно этиш экан. Кундузи билан меҳнат қилиб, шам олишга ҳам пули етмай, ой ёруғида китоб ўқиган адибни эслайлик. Китоб ўқишга ишқибозлигимизни билган қув Анор хола «Маккажўхоримни сўтасидан ажратиб берсаларинг «Сарик девнинг ўлими»ни бераман», деса, кечгача маккажўхори сўталаганимизни эслаб, кулгим келади.

— Шаҳар мактабларининг ҳар бир синфида кутубхоналар ташкил этдик, — дейди Гулистон шаҳар халқ таълими мудирини Раъно Абдужалилова. — Бу ишга ҳомий ташкилотлар, ота-оналар, ўқувчилар яқиндан кўмаклашди. Хайрли ишнинг эрта-кечи йўқ. Ёшларни чалғитувчи, ўқиш-ўрганишларига халақит қилувчи турли воситалар кўпайган пайтда биринчи навбатда ёрдамга келувчи куч бу — китоб. Ҳар ойда

шоир ва ёзувчилар билан ижодий учрашувлар ташкил этилган.

Таниқли адиб Шукурулло Абдуллаевнинг «Архарлар йўлбошчиси», «Қапалаклар водийси», «Чақмоқ ва кўёш» асарлари болаларнинг сеvimли китобларига айланган. Негаки, мазкур асарларда табиат, ҳайвонот дунёсидаги воқеаларнинг самимий тилда тасвирланиши болаларга табиатни севишга, уни чуқурроқ ўрганишларига ёрдам беради. Гулистон шаҳридаги 16-мактабда адиб билан бўлиб ўтган китобхоналар учрашуви ўқувчиларга бир олам қувонч бағишлади. Адибнинг эртақлари асосида тайёрланган саҳна кўринишлари ҳавола этилди. Шукурулло Абдуллаев ўқувчиларга бир қанча адабиётимиз намояндалари, жаҳон адабиёти намуналаридан ўқишни тавсия этди. Шунингдек, мактабнинг ижодкор устоз ва ўқувчилари ижодидан баҳраманд бўлди.

— Бугунги давримиз, биз, адабиёт муаллимларига катта масъулият юкламоқда, — дейди Мўътабар Абдуллаева. — Ўқувчилар характеридаги нуқсонларни бартараф этиш учун уларга яхши адабиётлар ва ибратли китобларни тавсия этишимиз, ўқишини талаб қилишимиз керак.

— Омборингиз донга тўла туриб, қўшнингиз оч ўтирса бўлмаганидек, уйингизда яхши китоблар туриб, атрофингизда маънавий дунёси тор одамлар юрса ҳам яхши эмас, — дейди Раъно Абдужалилова. — Синф хоналаримизда ташкил этилган кутубхоналар ўйда турган китобларнинг китобхоналарга етиб келишида катта ёрдам бермоқда.

Сандигингизни сара моллар билан тўлдирибдан эринмайсиз, кафе, ошхонага кириб фалон пулга овқатланиб, офринмайсиз, китоб жавонингизга ҳам (агар бор бўлса) бир қараб қўйишни эсдан чиқарманг.

**Насиба АБДУЛЛАЕВА,**  
«Turkiston» мухбири

Milliy o'yinlar

# Чавандозлик тантликини улуғлашди

*Кўпқари халқимизнинг энг қадимий ва оммавий ўйинидан бири бўлиб, унда халқ руҳи яшайди, орзу-умидлари акс этади. Майдондаги отларнинг киннаши, чавандознинг шиддатли ва жоҳати, томошабинларнинг хайқирғи-ю баковулнинг овозаси, билмидонлиги — ҳамма-ҳаммаси бу ўйинни санъат даражасига кўтараяди. Ғурур, ор, номус чавандознинг муҳим хислати ҳисобланади.*



Қамчини этик кўнжиги текиб олган, юган учини эгар бошига илиб улоққа узалган чавандозни ҳеч ким шахидан қайтара олмайди. Кўпқари чинакам ориятли, шижоатли йигитларнинг мардоналик тимсолидир.

...Баҳор охирлаб қолганди. Коризқудук қишлоғида катта халқ сайли бўлиб, унда уч кун улоқ-кўпқари бериладиган бўлди. Пойга мусобақаларига ҳатто қўшни вилоятлардан ҳам чавандозлар келган. Да-стлабки кун мезбонлар сон жиҳатдан кўп бўлса-да, уларнинг ҳеч бири улоқ ололмади. Туман оқсоқоллари чавандозлардан кўнгли тўлмай қандай йўл билан бўлмасин, донғи чиққан Бунёд полвонни топиб келиши учун икки отликни жўнатади. Полвон оқсоқоллар раъйини қайтаролмай, халқ сайли томон йўлга тушди...

Ям-яшил майсаларга бурканган қир-адирлар ишқибозлар билан тўлиб-тошган. Сайхонликда 300га яқин улоқчи отлар тўпланган. Улар орасида юлдузни кўзловчи донғи чиққан қорабайир, қизил жийрон, бойқўнғир,

қамишқулоқ саман, оқ қоптол каби зотдор отлар ҳам бор. Улоқ ўртага ташланди, баковул совринни эълон қилди ва чавандозларни ҳалолликка чорлади.

Ўрқачли тоғлар билан қуршалган сайхонликда чопайётган тулпорлар туёқларидан гўё ўт чақнар, кўтарилаётган қуюқ ва сарғиш чанг осмону фалакка ўрлаб борарди. Отлар тўдаси гоҳ бузилиб тарқалар, гоҳ қамчи зарби ва полвонлар қийқириғидан тагин сафга қўшилди. Улоқ-кўпқари пойгаси қизгин тус олиб, тобора марра сари интилайётган Бунёд полвоннинг қорабайири олдини бахмаллик Узоқ полвон бўз оти билан тўсди. Яккама-якка улоқ тортишувлари ўн-ўн беш дақиқагача чўзилди. Охири улоқ икки нимтага бўлиниб, полвонлар бирин-кетин марра томон яқинлашди. «Марра ким томонда? Энди соврин уларнинг қайси бирига насиб этар экан?», деган саволлар ҳамма-ни ўйлантирар ва ўртакашнинг ҳукмини сабр-тоқат билан кутарди. Шу пайт радиокарнайдан «Улоқнинг бўйин томони кимда бўлса, ўша чавандоз голиб»,

деган хабар эълон қилинди ва Бунёд полвон номига олқишлар ёғилди...

Мана беш йилдирки, Фаллаорол туманидаги «Аббос-Али» фермер хўжалиги аъзоси Бунёд-жон Аббосов нафақат Жиззах вилояти, балки қўшни вилоятларда бўладиган кўпқариларда ҳам кўплаб совринларни қўлга киритиб келмоқда. Фермер хўжалиги раҳбари Хайрулла Аббосов бир неча йилдан буён туманда халқимизнинг севимли улоқ-кўпқари ўйинини янада ривожлантиришга бош-қош бўлиб келаяпти. Натижада Бунёд-жон издошлари сифатида Анвар Жўраев, Ойбек Аббосов, Шароф Сувонов каби эпчил, чаққон ва ҳар томонлама чиниққан чавандозлар етишиб чиқди.

Бунёд полвон ўн етти ёшидан улоқ-кўпқари пойгаларида қатнашиб, уларнинг ҳеч биридан қуруқ чиқмаган. Ҳар йили вилоят биринчилиги бахсларида иштирок этиб, совринли ўринларни эгаллаб келади. Қаҳрамонимиз республика миқёсидаги турнирларнинг доимий иштирокчиси. Маданият ва спорт ишлари вазирлиги ҳамда Республика улоқ-кўпқари федерацияси ташкил этган мусобақаларда кумуш ва бронза медалларни қўлга киритган.

Ота-боболаримизнинг марду майдонлик, жасорат, эпчиллик каби хислатларини ўзида ифода этувчи қадимий ва ҳамиша навқирон кўпқари мусобақалари ёшларимизда жасурлик, уддабуронлик, зукколик фазилатларини камол топтиришда ҳаёт мактаби вазифасини ўтайди.

**Абдулла САИДОВ**  
Жиззах вилояти

Mutaxassis o'goh etadi

## Ҳамиша камарбастамиз

«Олов — тилсиз ёв», деб бекорга айтилмайди. Бу офатга қарши ёнгин хавфсизлиги хизмати ходимларининг саъй-ҳаракатлари, кўнғилсиз ҳодисаларнинг олдини олиш борасидаги профилактик ишларга қарамай, баъзида кимларнингдир хатолари, хавфсизлик қоидаларига риоя қилмасликлари, ёш болаларнинг олов билан ўйнашлари натижада кўп бўлмаса-да, кўнғилсиз воқеалар учраб турибди.

Ёнгин содир бўлишининг олдини олишда эса тарғибот ишларини янада кучайтириш лозим. Болаларга ёнгин, унинг оқибатлари, ёнгин чиққанда бажарилиши талаб этиладиган тадбирлар-

ни содда, қисқа қилиб тушунтирилса, мақсадга мувофиқ бўлади. Негаки, бола онғида ўт балоси ҳақида тасаввур уйғонса, унинг хавфлиги, содир этмаслик кераклигини тушуна боради. Бу борада мактабгача таълим муассасалари тарбияланувчилари билан хавфсизлик қоидалари, ёнгиннинг олдини олиш чоралари ҳақида жонли лавҳалар, кўргазмали қуроллар ёрдамида учрашувлар ўтказилса, аянчли ҳодисалар анча камаярди.

**Шухратилла УМАРОВ,**  
28-ҲЁХК кичик инспектори, сардор

Vatan himoyasi — muqaddas burch

Президентимизнинг 2014 йил 26 декабрдаги «Ўзбекистон Республикаси фуқароларини муддатли ҳарбий хизматга навбатдаги чақируви ҳамда белгиланган хизмат муддатларини ўтаб бўлган ҳарбий хизматчиларни Қуролли Кучлар резервиги бўшатиш тўғрисида»ги қарорига мувофиқ, ёшларни муддатли ҳарбий хизматга тантанали кузатиш ҳамда белгиланган хизмат муддатларини ўтаб бўлган ҳарбий хизматчиларни кутиб олиш маросимлари давом этмоқда.

## АСКАР БЎЛУР ЙИГИТНИНГ МАРДИ

Яқинда Навоий темир йўл вокзалида миллий армиямиз сафларида муддатли ҳарбий хизматни ўтаб қайтган навоийлик йигитлар тантанали равишда кутиб олинди. Маросимда ҳарбий соҳа вакиллари, кенг жамоатчилик ҳамда ота-оналар сўз олиб, мамлакатимизда ҳарбий хизматчилар учун яратилган имкониятлар, имтиёзлар, миллий армиямизнинг тубдан ислоҳ қилингани, унинг сафлари жасур ва мард, ҳар томонлама мукамал ўғлонлар билан тўлдирилганини фахр билан тилга олди.

Дарҳақиқат, бугун Қуролли Кучларимиз сафида хизмат қилиш йигитларимиз учун нафақат орзу, балки шон-шараф ишига айланди. Бунинг учун жисмонан соғлом, юқори интеллектуал салоҳият ва кенг дунёқарашга, юксак маънавий-руҳий тайёргарликка эга бўлиш лозим.

Таъкидлаш жоизки, муддатли ҳарбий хизматни ўташ мобайнида намуна кўрсатган аскарларнинг бир гуруҳи давлат имтиҳонларида имтиёзли баллга эга бўлди.

— Муддатли ҳарбий хизматда тобланиш баробарида, ҳақиқий ўғлонлик бурчимни бажарганимдан фахрланаман. Эндиликда олдимга қўйган эзгу мақсадларим сари дадил боришга ҳаракат қиламан. Олий ўқув юртига кириш учун имтиёзли баллни қўлга киритганим, келгуси орзуларимнинг ушалишига, ҳаётда ўз ўрнини мустақамлашга қанот бағишлайди, — дейди Жасурбек Рўзиев.

Албатта, фарзандини ҳарбий хизматга кузатиб, ҳеч фурсат ўтмай эғнида шарафли либос кийиб муқаддас замин, Она Ватан тинчлигини асраш учун қасамёд қилган ҳамда бу ваъдасини қалб тубига жойлаб қайтган аскарларнинг ота-оналари учун бу кун ўзгача фахр-ифтихор тўйғуларини бахш этди.

— Фарзандимни ҳарбий либосда кўриб, кўнглим тоғдек кўтарилди. Ўғлимнинг ҳарбий хизматда Ватанимиз осойишталигини, осмонимиз мусаффолигини таъминлашдек шарафли вазифани адо этиб қайтганидан бахтиёрман, — дейди аскар онаси Наргиза Облаёрова.

Ўрт тинчлиги ва хавфсизлигини таъминлаш, халқ осойишталигини муҳофаза этиш — армияда хизмат қилаётган йигитларнинг нафақат муқаддас бурчи, балки улар учун бу олий шараф, шунигиндек, ҳаёт мактаби ҳамдир.

**Отабек АСЛОНОВ,**  
«Turkiston» мухбири

2015 yil — Keksalarni e'zozlash yili

## Кутилмаган ташриф

дилларга қувонч улашмоқда

Ёши улуғларни қадрлаш, уларга ҳурмат-эҳтиром кўрсатиш халқимизга хос азалий қадриятлар ҳисобланади. Зеро, қариялари қадр топган юртда меҳр-оқибат, кут-барака, тинчлик-хотиржамлик бардавондир.

Яқинда сирдарёлик «Камолот»чилар Кексаларни эъзозлаш йили муносабати билан «Кутилмаган ташриф» акциясини амалга оширди. Ёлғиз кексалар ҳолидан хабар олиш, уларга ғамхўрлик кўрсатиш, ибратли ҳаёт йўлларини тенгдошларимизга етказишни кўзлаган акциянинг дастлабки босқичи Гулистон шаҳридаги Шароф Рашидов, «Сайқал», «Намуна», «Бўстон», «Улуғбод» маҳаллаларида ўтказилди. Унда «Камалак» болалар ташкилотининг фаол ва ташаббускор сардорлари ёлғиз истиқомат қилаётган отахон ва онахонлар хонадонларида бўлиб, уй юмушларига кўмаклашди. Меҳрибон невараларининг бундай хайрли ишларидан хурсанд бўлган кексаларимиз ёшлиги, ҳаёт йўллари ҳақида ҳикоя қилиб берди.

— Мамлакатимизда биз, кексаларга кўрсатилаётган эътибор ва ғамхўрликдан мамнунмиз. «Камолот»чиларнинг бугунги ташрифи эсда қоларли воқеа бўлди, — дейди Шароф Рашидов маҳалласида яшовчи саксон олти ёшли онахон Вера Рогожена.

Дарҳақиқат, нуруний отахон ва онахонларимизнинг инсоний ва ахлоқий фазилатларга бой суҳбатини олиш ёшлар учун ҳаёт мактабидир. Шу боис «камолот»чилар бундай хайрли ишлари орқали вилоятнинг барча туман ва шаҳарларида истиқомат қилаётган ёлғиз қариялар хонадонига кутилмаган ташриф буюришни келишиб олди.

**Наргиза ХОЛБОЕВА,**  
Сирдарё вилояти «Камалак» болалар ташкилоти раиси

Ўзбекистон “Камолот” ёшлар ижтимоий ҳаракати, Республика Марказий банки, Савдо-саноат палатаси, Олий ва ўрта махсус таълим вазирлиги, Ўрта махсус, касб-хунар таълими маркази, “Микрокредитбанк”, “Агробанк”, “Қишлоқ қурилишбанк”, “Ипотекабанк”, “Ўзбекистон саноат-қурилиш банки”, “Асакабанк” каби тижорат банклари, Ўзбекистон Фермерлар кенгаши ҳамда “Хунарманд” уюшмаси билан ҳамкорликда

**MENING  
BIZNES  
G'OYAM**



## «МЕНИНГ БИЗНЕС ҒОЯМ»

*танловини эълон қилади*

**Танловдан кўзланган мақсад:** академик лицей ва касб-хунар коллежлари битирувчиларининг бандлигини таъминлаш, уларни кичик бизнес ва хусусий тадбиркорлик фаолиятига кенг жалб этиш, касаначиликни ривожлантириш, ёшларга ўз бизнесини йўлга қўйишда микроомлиявий хизматлар кўрсатиш орқали янги иш ўринларини яратишдан иборат.

Танлов республика миқёсида февраль — май ойлари давомида 3 босқичда ташкил этилади. Унда республикамиздаги барча академик ли-

цей ва касб-хунар коллежларининг битирувчилари иштирок этиши мумкин.

Танловда иштирок этиш учун анкеталар жорий йилнинг 1 февралдан 1 апрелига қадар “Камолот” ёшлар ижтимоий ҳаракатининг худудий ҳамда маҳаллий кенгашларида қабул қилинади.

**Батафсил маълумотларни [www.kamolot.uz](http://www.kamolot.uz) сайти ва (0-371) 170-90-34 телефон рақами орқали олишингиз мумкин.**



## МАЗМУНГА БОЙ БОЛАЛИК

Тошкент вилояти Қибрай туманидаги 8-мактабгача таълим муассасасида 164 нафар кичкинтой замонавий шароитларда таълим-тарбия олмоқда.

Муассасанинг 13 нафар педагог-тарбиячиси уларнинг ҳар бир куни мазмунли ва завқли ўтиши учун масъул. Таълимий-ўйин, атроф-олам билан таништириш, қуриш-ясаш, ўқиш ва саводга тайёрлаш машғулоти эркин, қизиқарли тарзда ўтаётгани боис болажонлар билим ва кўникмани тез ва осон эгаллаётди. Уйнаб-ўрганишга асос-

ланган инглиз тили машғулотида, айниқса, уларнинг фаоллиги кузатилмоқда.

**СУРАТДА:** (чапдан) муассаса тарбияланувчилари Ирода Камолова ва Муслима Собирова.

**ЎЗА фотомухбири**  
Оқил **ФУЛОМОВ** олган сурат.

### Sport

## Ўзбек футболли

Ўзбек футболининг тарихи XX аср бошларига бориб тақалади. 1912 йил Кўкон шаҳрида илк ўзбек футбол жамоаси ташкил этилди. Даврнинг ўзига хос бу янгилиги бутун Фарғона водийсига тарқалди. Тез орада футбол ўйини мамлакатимизнинг бошқа ҳудудларида ҳам оммалашиб, янги жамоалар пайдо бўла бошлади. Натижада ўтган асрнинг 20-30 йилларига келиб, мамлакат биринчилиги баҳсларини ўтказиш йўлга қўйилди.

1928 йилда Ўзбекистон миллий терма жамоасига асос солинди. 1956 йилда Тошкент шаҳрида «Пахтакор» жамоасининг ташкил этилиши ва шу номдаги стадионнинг қурили-

ши мамлакатимизда футбол спортининг ривожланишида муҳим туртки бўлди. Жамоа тез орада халқаро майдонларда мамлакатимиз шарафини муносиб ҳимоя қила бошлади.

Истиқлолга эришгач, мамлакатимизда футболга алоҳида эътибор қаратилди. 1992 йилда Ўзбекистон футбол федерацияси ташкил этилди ва шу йилдан эътиборан Ўзбекистон ўзининг миллий чемпионати ва кубоги ўйинларини ўтказиш бошлади. 1994 йилда Ўзбекистон Халқаро футбол ассоциацияси (ФИФА) ва Осиё футбол конфедерацияси (ОФК)нинг тўлақонли аъзосига айланди. Шу йилдан бошлаб, миллий терма жамоамиз халқаро миқёсдаги мусобақаларда қатнашиш ҳуқуқини қўлга киритди. Ислохотлар тез орада ўз натижасини кўрсатди. Терма жамоамиз 1994 йил Хиросима мезбонлик қилган XII Осиё ўйинларида зафар кучди.

**Санжар ИСМАТОВ,**  
«Turkiston» мухбири



**Ҳофиз Хоразмий**

**ҒАЗАЛ**

*Ой юзунга жон била то бандаман,  
Меҳри равшандил бикин тобандаман.*

*Кўргали юзунг гулистонин кўзум  
Завқ бирла гул бикин пурхандаман.*


*Гулни ўхшатғали ол энгларинга,  
Бу жиҳаттин лолатак шармандаман.*

*Пойбўсунг даст бергали манга,  
Топтим, эй жон, давлати поянда ман.*

*Жонни бердим бир йўли йўлингда, лек  
Ишқинг ила то қиёмат зиндаман.*

*Ман санга жон бирла ошиқман вале  
Сан, нигоро, қандасан, ман қандаман?*

*Сан шаҳаншоҳи замонсан ҳусн ила,  
Ҳофизи бечоратак ман бандаман.*



«Тарих юз эллининг аввалида қосуд битилдиким, пайғамбарлар қиссаларинга ҳаят рағбатим бор.

...Ўқумоқга кераклик, ўрганмакга яроғлиғ бўлғай эрди, теб илтимос янглиғ ишорат бўлди эрса нечама ўзумни ул ишга лойиқ, ул амалга мувофиқ эрмасин билмиш эркан ўзумни оғирлаб нафс сақламиш бўлуб ўғур (вақт, пайт) бўлсун теб бу оғир ишга ўғрадимиш (қиришдик, қўл урдик)...»

**Ушбу сўзлар ўзбек ва жаҳон мумтоз адабиётининг ноёб дурдоналаридан саналмиш асар муқаддимасидан олинди. Айтинг-чи, бу қайси асар ва муаллифи ким?**

**Жавобингизни 24 февраль соат 16:00га қадар 233-79-69, 233-95-97 рақамлари орқали билдиришингиз мумкин. Тўғри жавоб йўллаган мухлислар номи газетамизда эълон қилинади. Саволларга энг кўп тўғри жавоб топган муштарийлар йил якунида қимматбаҳо совғалар билан тақдирланади.**

**Ўтган сондаги саволнинг жавоби:**

**Маҳмуд Замахшарий.**

Тошкент шаҳридан Қобилбек Каримбеков, Бухоро шаҳридан Мунира Дамеронова, Бекобод шаҳридан Гулрух Мамарасулова тўғри жавоб йўллади.

*Тлафаккур қилмондан бир қатра*

Камол эт касбким, олам уйидин  
Санга фарз ўлмағай ғамнок чиқмоқ,  
Жаҳондин нотамом ўтмак биайниқ,  
Эрур ҳаммомдин нопок чиқмоқ.

**Алишер Навоий**

### МУАССИС

«КАМОЛОТ» ЁШЛАР ИЖТИМОЙ  
ҲАРАКАТИ МАРКАЗИЙ КЕНГАШИ

Газета Ўзбекистон  
Республикаси  
Матбуот ва ахборот  
агентлигида 2007  
йил 19 апрелда  
№ 0242 рақам билан  
рўйхатдан ўтган.

ISSN 2010-6998



91772010699000

### БОШ МУҲАРРИР

**Каримов**  
**Фахриддин Турдалиевич**

### Тахрир ҳайъати

Баҳодир Фаниев, Меҳриддин Шукуров (бош муҳаррир ўринбосари — «Turkiston»), Элмурод Нишоннов (масъул котиб — «Turkiston»), Ирина Кочергина (бош муҳаррир ўринбосари — «Молодёжь Узбекистана»), Елена Калинина (масъул котиб — «Молодёжь Узбекистана»), Рустам Қосимов

### Навбатчи муҳаррир

Назарова  
Майсара  
Тошевна

### Саҳифаловчи

Рўзиев  
Зафар  
Хусанович

Газета таҳририят компьютер марказида терилди ва саҳифаланди.

**Таҳририят манзили:** 100029, Тошкент, Матбуотчилар кўчаси, 32.  
**Телефонлар:**  
(371) 233-95-97. (371) 233-79-69  
**e-mail:** info@turkiston.uz

«Шарқ» наشريёт-матбаа акциядорлик компанияси босмахонасида, А-3 форматда чоп этилди. Ҳажми — 2 босма табок.  
Корхона манзили: «**Буюк Турон**» кўчаси, 41.

Индекслар: **203, 3203**  
Баҳоси келишилган нарҳда.

Буюртма Г-256.  
Адади — 11261

Босишга топшириш вақти — 21.00  
Тоширилди — 23.05  
ЎЗА якуни — 22.50

Офсет усулида босилган.

1 2 3 4 5